

Fièrnu ta Akinan?

Ora e palabra “fièrnu” ta menshoná, algun ta hari òf bisa “aki ta fièrnu”. Pa nan, fièrnu ta e kosnan malu nan tin ku soportá.

Otronan ta afirmá ku un lugá di sufrimentu etèrno no ta eksistí. Nan ta opiná ku Beibel ta usa e palabra pa referí na graf òf morto. Maske esei ta e kaso den algun teksto, e no por ta bèrdat tur biaha. Beibel ta papia bon kla di un lugá di sufrimentu ...asina kla ku maske kuantu bo ke ignor’é, bo no por!

Si bo ta insistí ku fièrnu no ta eksistí, anto bo tambe tin ku konkluí ku Hesus tabata un gañadó kruel, pasobra El a papia hopi tokante fièrnu. I si Hesus ta un gañadó, E no por ta Dios, E no por salba ningun hende, i Su morto riba krus tabata enbano.

Ma debí ku Hesus ta Dios omnisiente (sabiendo tur kos) i ta stima hende, ta lógiko ku E lo atvertí hende di e realidat di un lugá di tormento pa hende por evitá di pasa nan etèrnidat aya.

Amputashon ta algu horibel. Tin hende ta preferá muri ku pèrdè un pia òf brasa. Hesus a enfatisá e seriedat di sufrimentu na fièrnu, ora El a deklará ku ta preferibel pa pèrdè un man, pia, òf wowo ku pasa etèrnidat na fièrnu (Marko 9:43-49).

Dios, siendo hustu, mester kastigá piká. *“Esun ku no obede-sé e Yu, lo no mira bida, ma e furia di Dios ta keda riba dje”* (Juan 3:36). Dios *“lo paga kada hende segun su obranan,.. na esnan ku...no ta obedesé e bèrdat, ma ta obedesé inhustisia— furia i indignashon”* (Romanonan 2:8-9). Segun Romanonan 6:23, *“pago di piká ta morto”* en kontraste di bida etèrno. *“Ma e kobardenan, i e inkredulonan, i e abominabelnan, i e matadó-nan, i e fornikadónan i e hasidónan di bruha, i e adoradónan di dios falsu i tur gañadó, nan parti lo ta den e lago ku ta kima ku kandela i swafel, kual ta e di dos morto”* (Revelashon 21:8).

Purgatorio—un lugá pa paga pa bo piká pa bo por yega shelu —no ta haña den Beibel. Alkontrario, segun Skritura morto ta sigui inmediatamente pa òf bida etèrno òf morto etèrno. E kasti-gu pa piká lo dura pa **tur etèrnidat**. *“I esakinan lo paga e kasti-gu di pèrdishon etèrno”* (2 Tesalonisensenan 1:9). Dios lo bisa na malbadonan: *“Apartá boso for di Mi, boso maldishonánan, bai den e kandela etèrno.”* Resultado di e sentensia aki lo ta: *“I esakinan lo bai den kastigu etèrno, ma e hustunan den bida etèrno”* (Mateo 25:41,46).

Akun pèrsona ta di opinion ku hende lo no ta konsiente despues di morto, pues hende lo no por sinti doló. Ma e kerensia ei tampoko ta kuadra ku Beibel. Hesus a ripití bes tras bes ku e kastigu lo enserá *“yoramentu i mordementu riba djente”* (Mateo 8:12; 13:40-43,49-50; 22:13; 24:51; 25:30). Hesus tambe a konta di un hòmber na fièrnu ku a pidi pa un solo gota di awa pa *“freska mi lenga; pasobra mi ta sufri agonia den e flam di kandela aki”* (Lukas 16:23-25). Palabra di Dios tambe ta bisa ku *“huma di nan tormentu ta subi bai ariba pa semper i semper; i nan no tin sosiegu di dia ni anochi”* (Revelashon 14:11).

Esei ta loke Dios ta deklará den Skritura santu. **Dios no ta gaña!** Ta keda na bo awor kiko bo lo hasi. Bo por skohe pa hasi manera abestrus, hinka bo kabes den santu, i nenga ku fièrnu ta eksistí. Ma esei no ta kambia e echu... ni tampoko bo destino etèrno. E di dos alternativa ta ku bo por aseptá loke Beibel ta bisa tokante fièrnu, anto tuma pasonan pa evitá di bai aya.

Kon bo por skapa bo destino na fièrnu? Realisá ku bo ta un pekador ku ta meresé sufrimentu etèrno na fièrnu. Rekonosé ku abo no por hasi nada pa skapa e destino horibel ei. Ma Hesus ya kaba a tuma bo kastigu dor di muri riba krus pa bo piká. E ta ofresé pa pordoná bo, si bo asept’E komo bo úniko Salvador.

Si bo ta aseptá Su pordon i bo ta pidi Kristo pa skapábo di e kastigu ku bo ta meresé pa bo piká, E lo salbábo.

Fièrnu ta un lugá real...no un fábula, no un wega, ni aki-nan. Ma e ta un lugá ku bo por skapa si bo tuma e pasonan aki.